

實用

中醫典籍寶庫

第卅二冊

綫裝書局

怪

疴

單

朱震亨著

怪病單

元朱丹溪著

明周履靖梓

治人鼻中毛出晝夜長一二尺漸漸粗圓如繩
痛不可忍摘去更生此因食猪羊血過多而
然也用礪砂乳香飯爲丸水下十粒早晚各
一服病去乃止

一人忽覺自形作兩人並卧不別真假不語問
亦無對乃離魂也用硃砂人參茯苓濃煎服

真者氣爽而假者即化

治遍身忽然肉出如錐痒痛不能飲食名血癰
用赤皮荔枝燒灰水淋汁洗內服淡豆豉湯數
盞即愈

治人眼前常見禽蟲飛去捉之即無乃肝膽經
爲疾用酸棗仁羌活玄明粉青箱子各一兩
爲末每水煎二錢和滓服日三服

治人眼珠垂下至鼻大便血出名肝脹用羌活
水煎數服即愈

治人腹中有物作聲隨人語言名應聲蟲服雷
丸即愈

一人飲油五升方始快意乃髮入胃血裹化爲
蟲也用雄黃五錢水調服

治人腹中有虫如蟹走於皮下作聲如兒啼爲
筋肉之化用雷丸雄黃等分爲末摻猪肉上
炙而食之即愈

一人因着艾灸訖火痂便落瘡內鮮血片片如
胡蝶樣騰空飛去痛不可忍此是血肉俱熱

用大黃芒硝等分爲末水調下微利即愈

一人臨卧忽渾身虱出約五升血肉俱壞而舌尖血出不止用鹽醋湯飲十數次即愈

治人眼赤鼻張大喘渾身出斑髮如銅鐵絲硬乃目中熱毒氣結於下焦用白朮滑石各一兩水三碗煎至一碗半不住口飲盡乃效

一人卧於床四肢不能動只進得食好大言說喫物謂之失說物望病如說某物即以其肉與看不與食之失他物望也睡中流出饒唾

病即愈

治人手十指斷壞唯有筋連無節肉內虫出如
燈心長數寸遍身綠毛名血餘用茯苓胡黃
連煎服愈

一人遍身皮底渾渾如波浪聲痒不可忍抓之
血出不能止名氣奔用人參苦杖青鹽細辛
各一兩水二碗煎十數沸飲盡便愈

治眼內白眚俱黑見物依舊毛髮直如鉄條不
語如醉名血漬用五靈脂酒調下二錢愈

治人口鼻中氣出盤旋不散疑似黑蓋過十日
漸漸至肩與肉相連堅勝鉄石無由飲食多
因瘡後得之用澤蘭水煎日飲三盞五日愈
治頭面發熱有光色他人手近如火灸用蒜汁
半兩酒調下吐物如蛇遂安

一人渾身生泡如甘棠梨破則出水內有石一
片如指甲大其泡復生抽盡肌肉不可治矣
急用三稜莪朮各五兩爲末分三服酒調下
治夜有醉者口渴誤吞水蛭腹痛黃瘦不進飲

食用小死魚三四箇猪脂煎鎔攪勻入巴豆
十粒碎爛和田中乾泥丸如菉豆大以田中
冷水吞下一丸泄下爲度

治人忽然氣上喘不能語口中涎流吐逆齒皆
搖動氣出轉大即悶絕名傷寒併熱霍亂用
大黃人參各五錢水三盞煎一盞服

一人口内生肉毬有根線長五寸餘吐毬出方
可飲食以手輕捏痛徹於心水調生射香一
錢頻頻服之三日根化而愈

治人手足甲忽然長倒生肉刺如錐食葵菜自
愈

治人面上及遍身生瘡似貓兒眼有光彩無膿
血冬則近脛名白寒瘡多食魚雞苽韭即愈
治人脅破腸出臭穢急以香油抹腸送入即不
出又以人參枸杞子煎湯淋之皮自合喫猪
腎粥十日愈

一人小便中出屎大便出尿名交腸用舊幘頭
燒灰洒下五分愈

治玉莖硬不痿精流無歇時如針刺捏之則脆
乃爲腎漏疾用韭子破故帛各一兩爲末每
三錢水煎日三服即止

一人身及頭面肉腫如蛇狀用雨濕磚上青苔
一錢水調塗立消

治人大腸內虫出不斷斷之復生行坐不得用
鶴虱末水調服五錢自愈

治蛟龍瘕用寒食飯三升每食五合日三服吐
出蛟龍而愈

治鼻腥臭水流以碗盛而視之有如鉄色蝦魚
如米大走躍捉之即化爲水此肉壞矣食雞
肉一日二次不過一月而愈

治兩足心凸如腫硬如釘脛骨生辟孔流髓身
發寒戰惟思飲酒此肝腎氣冷熱相吞用川
烏炮爲末付之內煎韭菜湯服之愈

治四肢節脫但有皮連不能舉動名曰筋解用
黃蘆酒浸一宿焙乾爲末酒調下二錢多服
即安

一人咽喉間生肉層層相疊漸漸腫起有竅出
臭氣用臭橘葉煎服愈

有小兒身上發瘡初生如魚胞又如水晶碎則
水流用蜜陀僧羅極細摻之

一兒初生遍身無皮俱是赤肉掘土坑卧一宿
即長皮又方白早米粉乾撲於上候生皮乃
止

治人項上生瘡如櫻桃有五色瘡破即項皮斷
逐日飲牛乳自消

治人寒熱不止四肢如石擊之如鐘聲日漸消瘦用茱萸木香等分水煎一二服即愈

一人大腸頭出寸餘候乾自退落又名截腸病用芝麻油器盛坐之飲大麻子汁數升愈

治人腹中如鉄石臍中水出旋變作虫行之狀遶身匝皮痒痛不忍扒掃不盡濃煎蒼朮浴之又以蒼朮加麝香水調服之

一人眉毛搖動目不能視喚之不應但能飲食用蒜三兩取汁酒調下即愈

一人毛竅節次血出少間不出即皮脹如鼓口
鼻眼目俱脹合名脉溢用生姜汁并水各一
二盞服之即安

人面瘡 昔人患此于臂上滴酒瘡口中即面
赤與物食之即肉脹獨以貝母付之則歛眉
閉口若有苦楚之狀乃煎貝母湯以葦筒灌
之數日成甲而愈

一婦人年二十餘腮生一竅口中所欬膿血與
竅相應而出此肺痿也用人參黃芪當歸加

退熱排膿之劑而愈

治患蛇瘕乃蛇精及液沾菜上人悞食之腹內成蛇或食蛇亦有此証其人常飢食之即吐用赤頭蜈蚣一條炙爲末分二服酒下

鼈瘕痛有未止或食鼈即痛用雞屎一升炒黃投酒中浸一宿焙爲末元浸酒調下

雞瘕有病冷痰者醫曰因食白淪雞過多故也用蒜一枚煮服乃吐一物如升大痰暴開視之乃雞雛也再服吐十三雛而愈

治婦產後有傷胞破不能小便常漏濕不乾用
生絲絹一尺剪碎白牡丹根炒白芨各末一
錢水一碗煎至絹爛如餵空心頓服不得作
聲作聲即不効

一人心漏當胃數竅血液常流二十年用鹿茸
酥炙附子炮鹽花棗肉爲丸每酒下三十丸
半月而愈

治婦人產後忽兩乳細小下垂過小腹痛甚名
乳懸用川芎當歸各二斤內用半斤水煎服